



01. marts 2024

UPA2024/133

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nakorsat namminersortutut nunatsinni aallartitsisinnaangornissaat anguniarlugu Naalakkersuisut inatsisiliornissamik peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Doris Jakobsen Jensen, Siumut)

Tunngavilersuut:

Nunatsinni nakorsat namminersortut.

Peqqinnissaqarfik 1992-imi Namminersornerullutik Oqartussanit akisussaaffigineqalerpoq, taamanili akisussaaffik tigungatsigu nakorsat namminersortoorusuttut inatsisitigut suli periarfississimanngilagut.

Namminersortoorusunermik isuma, ukioq kingulleq nunatsinni nakorsat ilaannit fb aqutugalugu qaqqinneqarpoq, namminersorlutik nakorsiartarfiutitaarusuttunut suli naammaginaratumik aqutissiuissimannginnerput pillugu. Qaqitsisup erseqqissaatigaa nunatsinni nakorsatut namminersulissagaanni peqqinnissaqarfimmik suleqateqarsinnaanerup inatsisitigut periarfissaqannginnera. Tassani suleqatigiissutigineqarsinnaapput, innuttaasut journaaliinut attuumassutillit, aaviisarnissamut tunngasut, tarrarsuisarnissamut tunngasut,

nakorsaatinut tunngasut il.il. taassuma nakorsap erseqqissaatigaa tamakku tamarmik nunani allani inatsiseqartut inatsiseqartussaallutillu.

Paasissutissat malillugit namminersortunngornissamut Peqqissutsimut Naalackersuisoqarfimmiit akuerisaasoqarsinnaavoq kisiannili inatsisit amigaataatillugit namminersortutut aallartinniarneq ajornartorsiutaavoq, tassami inatsisinik malitassaqarani iluamik sulisoqarsinnaangimmat, taamaammat inatsisiliortoqartariaqarpoq nakorsat namminersortunngorusuttut periarfissinniarlugit.

Nakorsatut namminersortunngorsinnaanermik periarfissiineq, nakorsanik nutaanik nunatsinnut qammaataasinnaavoq soqutiginnilersitsillunilu. Taamaattoqassappat nunatsinnut iluaqutaalissasoq qularnangilaq, taamatut iliorneq siunissamut isiginerussammat pitsaasuullunilu.

Pisortanut aningaasatigut allaffissornikkullu kingunerisassai:

AC- Fuldmægtigip ukiup ataatsip iluani sulinera, 250.000-500.00 kr. Nalilik.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.